

standi metaphorice usurpare constat. Regnum Dei enim non est *cibus & potus*, ut proprio loquendo gustetur: juxta illud *Rom. XIV, 17.* adeoque gustare aut prægustare beatitudinem, est intelligentiam, experimentum aut fruitionem bonorum vitæ æternæ spiritualium mente aut animo antecapere: prout alias etiam in ipsa Scriptura τὸ *gustare*, cum ad mentem refertur, idem est ac *intelligere, experiri, frui.* Vid. *Flacius* in *Clave*, & *Glassius* *Reth. S. Tract. I. c. XII, 360.* (1305.) *Edoardus Leigh* in *Criticis S.* voce *γεύω* p. l. p. 84.

IX. Solet autem circa vocabula *γεύω* & *γεύομαι*, quæ in sacris occurrunt, & latino, *gusto*, respondent, a Philologis observari, quod cum proprie accipiuntur, aliquando quidem denotent actum, quo rei sapidæ paululum sumitur, & lingua ac palato aut primis, quod ajunt, labris, qualitas aut sapor ejus tentatur: vid. *Job. XII, 11.* *Matth. XXVII, 34.* quo posteriore loco, τὸ *gustare* & *bibere* a se invicem distinguuntur; alias autem actum ipsum comedendi aut bibendi, quo cibus aut potus intime recipitur, & in succum ac sanguinem convertitur, significant. Vid. *Prov. XXXI, 15.* *Act. X, 10.* & *Cap. XX, 11.* Atque hac ratione quando verba ista ad actiones mentis significandas transferuntur, cumque degustu aut prægustu beatitudinis in hac vita sermo est, disquiri cœpit: utrum ipsa essentialis beatitudo, seu visio Dei beatifica, id est, clara & omnem speciem ac medium excludens, adque adeo immediata illa Divinæ essentiae cognitio? an analogum quiddam & illustre signum ejus, in hac vita hominibus obtingat? Quorum illud τὸ *gustare*, posteriore modo; hoc eidem, sensu priore accepto, vi metaphoricæ locutionis respondeat? Sed priusquam de his agamus plenius, de Causis Efficientibus, & Impulsivis itemque Subjectis gustus aut prægustus illius, quædam præmittemus.

X. Causam efficientem principalem esse Deum optimum maximum, Patrem luminum, a quo omnis donatio bona & omne donum perfectum descendit: juxta *Jac. I, 17.* dubium esse non potest. Ille enim Creator, Restaurator & Salvator noster est, ille glorificat electos suos. *Rom. VIII, 30.* dat filiis suis regnum, *Luc. XII, 32.*

B 4

dat